

Na osnovu čl. 41., 42. i 143. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH", br. 27/03 i 21/09), i Zaključka Doma naroda Parlamenta Federacije Bosne i Hercegovine broj:02/c-14-3-978, 02-17-1-1135/15 od 23.11.2015.godine, Dom naroda Parlamenta Federacije Bosne i Hercegovine na \_\_. sjednici, održanoj \_\_.2016. godine, donosi

## **PRIJEDLOG MJERA**

S ciljem obezbjeđenja skladnog rada, dugoročnog održivog razvoja i uspješnog poslovanja elektroprivrednih društava a vodeći računa o:

- sigurnosti u proizvodnji električne energije,
- sigurnosti u snabdijevanju kupaca električnom energijom,
- stvaranju uslova za optimalno korištenje proizvodnih i distributivnih kapaciteta i postizanja povoljnih ekonomskih efekata,
- poboljšanju poslovnih procesa uz povećanje produktivnosti i racionalizaciju troškova poslovanja,
- vođenju jedinstvene poslovne i razvojne politike radi kontinuiranog rasta vrijednosti društava,
- racionalnom ulaganju u izgradnju i rekonstrukciju elektroenergetskih kapaciteta i razvoj poslovnih aktivnosti i
- poduzimanju mjera zaštite okoline i unapređenja sistema upravljanja okolinskim aspektima, te osiguranja implementacije načela održivog razvoja;

uključujući i uzimajući u obzir ciljeve EU i pravnu stečevinu EU, posebno uvažavajući polazno i buduće tehnološko, ekonomsko i pravno-regulatorno stanje u Bosni i Hercegovini, potrebno je poduzeti slijedeće aktivnosti i mjere:

1. Izvršiti usklađivanje Zakona o električnoj energiji u Federaciji Bosne i Hercegovine ("Službene novine Federacije BiH", br. 66/13 i 94/15), na način koji će osigurati punu usklađenost ovog zakona sa pravnom tečevinom EU u sektoru električne energije kao i usklađenost sa zakonodavstvom u sektoru električne energije na nivou Bosne i Hercegovine. Ključne promjene i obaveze koje proizilaze iz Zakona o električnoj energiji Federacije Bosne i Hercegovine a koje se trebaju izvršiti su:
  - Funkcionalno razdvajanje djelatnosti,
  - Pravno razdvajanje i neovisnost za djelatnost distribucije (pravni oblik, organizacija i donošenja odluka),
  - Računovodstveno razdvajanje djelatnosti reguliranog i nereguliranog snabdijevanja.
2. U skladu sa zakonom predviđenom procedurom donošenja, izvršiti reviziju Programa o prestrukturiranju elektroenergetskog sektora u Federaciji Bosne i

Hercegovine kako u smislu rokova tako i u smislu sadržaja, imajući u vidu činjenicu da Dom naroda Parlamenta Federacije Bosne i Hercegovine nije dao saglasnost na Program o prestrukturiranju elektroenergetskog sektora u Federaciji Bosne i Hercegovine („Službene novine Federacije BiH“, broj: 20/14) zbog čega isti nije u primjeni.

3. Izvršiti usklađivanje projekcija dugoročnog plana razvoja EP BiH sa nacionalnim planom redukcije emisija (NERP) BiH nakon njegovog donošenja posebno vodeći računa i o modernizaciji odabranih postojećih blokova uz izgradnju postrojenja za odsumporavanje i denitrifikaciju.
4. Harmonizovati postojeću zakonsku regulativu, otkloniti preklapanja nadležnosti, ukloniti nejasnoće i mogućnosti zlouporabe. Uključiti stručnu javnost u procese izrade zakonskih propisa. Produljiti razdoblje važenja dozvola i razviti mehanizme odgovornosti i žalbene postupke radi smanjenja rizika u realizaciji.
5. Pokrenuti aktivnosti na izmjenama Zakona o javnim nabavama Bosne i Hercegovine kad je u pitanju nabava električne energije na srednjoročnom i dugoročnom nivou za javna elektroprivredna poduzeća, kako bili u istom položaju kao i svi drugi trgovci u Bosne i Hercegovine (izbjegavanje diskriminacije).
6. Koncipirati planove elektroprivreda i rudnika u Federaciji Bosne i Hercegovine tako da omoguće rudnicima ne samo rast obima proizvodnje, već i poboljšanje efikasnosti i znatno višu produktivnost. Imajući u vidu činjenicu da će, u strukturi proizvodnje električne energije u Federaciji Bosne i Hercegovine termoelektrane i dalje predstavljati temeljni dio proizvodnje, čak i u scenariju intenzivne gradnje kapaciteta na bazi obnovljivih resursa, te činjenice da deregulacija tržišta zahtjeva rast konkurentnosti, neophodan je drugačiji pristup prestrukturiranja rudnika koji podrazumijeva:
  - ubrzanje procesa poboljšanja poslovanja rudnika i prestrukturiranja djelatnosti rudarstva sa jasno definiranim nosiocima, ciljevima, rokovima i odgovornostima,
  - depolitiziranje kadrovske politike uz stavljanje stručnosti i kompetencija na prvo mjesto i vraćanje u stvarnu nadležnosti organima EP BiH,
  - usmjeravanje razvoja djelatnosti rudarstva i investicija na profitabilne i konkurentne rudarske kapacitete, uz zatvaranje neproduktivnih i neodrživih pogona.
7. Prioritetno pristupiti izgradnji kapitalnih projekata ( TE Tuzla 7, HE Vranduk, HE Janjici, VE Podveležje, TE Kakanj 8, VE Mesihovina, CHE Vrilo, RITE Banovići fotonaponskih elektrana) i stvaranju pretpostavki za nastavak kontinuirane realizacije narednih projekata.
8. S ciljem pokretanja aktivnosti na izmjenama i dopunama, preispitati odredbe Zakona o izdvajanju i usmjeravanju dijela prihoda preduzeća ostvarenog korištenjem hidroakumulacijskih objekata („Službene novine Federacije BiH“, br. 44/02 i 57/09). Analizirati mogućnost da se kroz dugogodišnje koncesione ugovore riješi pitanja prava korištenja vodnih resursa na duži rok uz troškove koncesionih naknada koji bi bili lako primjenjivi, uz razumne stope i iznose koji

ne bi negativno uticali na konkurentnost kompanije na domaćem i regionalnom tržištu.

9. Zaustaviti trend donošenja novih naknada i dažbina i rasta stopa postojećih, posebno komunalnih naknada za dalekovode (koridore) i ostalu el. energetska infrastrukturu, sa sagledavanjem mogućnosti da se na nivou Federacije Bosne i Hercegovine donesu novi propisi koji će regulisati ovu oblast, te da se u svim propisima koji su u primjeni eliminišu nejasne odredbe koje se odnose na način promjene/usklađivanja naknada.
10. Preispitati obavezu plaćanja kantonalne naknade "od posebnog značaja za Hercegovačko-neretvanski kanton" utvrđene donošenjem Zakona o vodama Hercegovačko-neretvanske kantona iz 2013. godine, kako bi se izbjegla situacija da se po jednom osnovu plaćaju dvije naknade, te poduzeti aktivnosti, odnosno obnoviti inicijativu za ocjenu ustavnosti člana 74. Zakona o vodama HNK putem Premijera Federacije Bosne i Hercegovine.
11. U potpunosti preispitati odredbe Pravilnika o načinu određivanja ekološki prihvatljivog protoka ("Službene novine Federacije BiH", broj 04/13) koje regulišu način utvrđivanja biološkog minimuma i od nadležnih ministarstava (Federalno ministarstvo poljoprivrede, vodoprivrede i šumarstva i Federalno ministarstvo okoliša i turizma), tražiti izmjenu i Pravilnika o načinu određivanja ekološki prihvatljivog protoka.

DN broj: \_\_\_\_\_

\_\_\_\_2016. godine  
Sarajevo

Predsjedavajuća  
Doma naroda  
Parlamenta Federacije BiH  
Lidija Bradara